

# Lai dat gas cun realisar eveniments gronds da sport

■ (rtr) La regiun da turissem Lai ha pudì realisar en ils ultims onns numerus gronds eveniments. Roland Anderegg, expert da turissem e docent a la HTW a Cuira, discorra d'ina istorgia da success. Avant diesch onns era Lai anc ina mediocra regiun da turissem quai che pertutga gronds eveniments. In sguard enavos sin il 2006 mussa che la regiun n'aveva strusch eveniments da gronda muntada. Il Campiunadi svizzer da biatlon ed ina cursa internaziunala da chauns da schlitta tutgavan tar ils puncts culminants da l'enviern 2006. Il 2016 è il Tour de Ski stà sin visità, la segund auta liga da biatlon ha fatg cursas a Lantsch ed era la cuppa mundiala da las dunnas alpinas ha gì lieu a Parpan. Cun cursas da mountainbike e downhill la stad vegn il program cumpletta. Cun la colliaziun dal territori da skis Lai-Arosa han ins pudì far in ulteriur grond pass. Er il portal dal territori da skis a Churwalden è vegni realisà. La glista dad innovaziuns è daventada lunga.

## Betg daplis, mabain megliers eveniments pel futur

Roland Anderegg è expert da turissem e docent a la HTW Cuira. Er el conferma che Lai ha fatg in grond svilup ils ultims onns. Ins sappia propi discurre d'ina istorgia da success. Dentant na po la purschida ussa betg crescher enavot sco ils ultims onns. Quests eveniments dovrian numnadain ina massa voluntaris e natiralmain era testas ch'èn prontas dad organisar tals eveniments. Qua èn ins tenor Anderegg bainbaud al cunfin. Tge che saja uss impurtant saja da pudair perfecziunar ils eveniments, uschia che quests eveniments existents restian era segir en la regiun da Lai. Quai na veglia dentant betg dir ch'ils eveniments orga-

nisads na sajan betg stads buns. Il cuntrari: Il Tour de Ski a Lantsch è vegni ludà en ils pli auts tuns. Vitiers vegn l'infrastructura cun la nova chasa da biatlon uss era anc ina giada optimà.

## L'avantatg è che la regiun da Lai sto lavurar ensemen

L'expert da turissem punctuescha dentant er adina puspè che Lai na saja betg l'unica regiun da turissem en Grischun che dettia gas. Lai haja simplamain pudì far il pli grond svilup cunquai ch'els n'avevan anc betg propi gronds eveniments. San Murezzan per exempel haja gia dapi onns la cuppa mundiala dals alpins, cursas da bob e skeleton u er il White Turf. Era Tavau po dapi onns generar daplì pernottaziuns cun cursas da la cuppa mundiala da passlung, il FEM u er la Cuppa Spengler. Tenor Anderegg lavuran tut las grondas regiuns turisticas dal Grischun bain, betg mo Lai. In avantatg che Lai haja dentant envers ils auters lieus saja ch'ins saja avunda grond per eveniments impurtants, dentant mo sche tuts lavuran ensemen en la regiun. Uschia èn tuts cuntents da survegnir in toc da la petta e n'han betg tema che l'auter pudess survegnir in toc pli grond. Quel problem e cumbat è conuscent tar las regiuns pli grondas nua che mintgin fa pli gugent insatge pitschen per sasez enstagl da far insatge grond ensemen e lura parter il gudogn. A Lai n'è quai betg il cas. A Lantsch han lieu las occurrenz nordicas, a Parpan èn las cursas d'alpin ed a Lai è il center. Per il futur spera Roland Anderegg ch'ins optimeschia ils eveniments existents enstagl da crear ulteriurs eveniments en la regiun, quai en favur da las resursas limitadas en la regiun e per la qualitad dals eveniments.